

Na osnovu člana 35. Statuta Nogometnog/Fudbalskog saveza Bosne i Hercegovine, Izvršni odbor NS/FS BiH, na sjednici održanoj u Sarajevu, 23.05.2016. godine, d o n o s i

**PROPOZICIJE**  
**Premijer futsal lige BIH**  
**za takmičarsku 2016/2017. godinu**

**OPŠTE ODREDBE**

**Član 1.**

Ovim Propozicijama utvrđuje se: način rukovođenja i organizovanja Premijer futsal lige Bosne i Hercegovine za takmičarsku 2016/2017. godinu.

**UČESNICI TAKMIČENJA**

Učesnici u takmičenju Premijer futsal lige BiH su:

MNK Brotnjo, MNK Centar, KMF Čelinac, MNK Kaskada, KMF Leotar, MNK Mostar SG, MNK Seljak, KMF Tango, MNK Zrinjski, MNK Sofić, KMF Nevesinje i MNK Joker.

Na kraju takmičarske 2016/17. godine iz lige ispadaju 2 (dva) najslabije plasirana kluba.

Popuna lige vrši se sa po jednim najbolje plasiranim klubom u takmičenju futsal lige NS/FS Federacije BiH i FS Republike Srpske, odnosno sa klubovima koji budu ispunjavali potrebne uslove za takmičenje u Premijer futsal ligi BiH.

**Član 2.**

Takmičenjem Premijer futsal lige BiH rukovodi Komitet za takmičenje NS/FS BiH, u saradnji sa Sektorom za takmičenje i upravljanje događajima NS/FS BiH.

**Član 3.**

Pored utvrđenih opštih uslova za učešće u takmičenju Premijer futsal lige BiH klubovi moraju posjedovati odgovarajuće posebne uslove koji se ogledaju u sljedećem:

- da posjeduje riješenje i licencu da dvorana u cijelosti ispunjava uslove koju izdaje ad hoc Stručna komisija koju sačinjavaju i predstavnici Sekretarijata za stadione i bezbjednost NS/FS, Komiteta za takmičenje i Komiteta za sudije i sudijska pitanja NS/FS BiH;
- da su izvršili registraciju svojih igrača i stručnih radnika u nadležnom registracionom ili kantonalnom/županijskom/područnom savezu NS/FS BiH.
- da posjeduju određena materijalno-finansijska sredstva i da imaju konstituisane svoje organe unutar kluba.
- da ima potpisan ugovor o korištenju sale u terminima u kojima igra utakmice kao domaćin, po kalendaru takmičenja.

**ORGANIZACIJA TAKMIČENJA**

**Član 4.**

Sve utakmice takmičenja za prvenstvo Premijer futsal lige BiH igraju se prema Pravilima futsal igre koje je utvrdio međunarodni BOARD.

Takmičenje se odvija u dva dijela, i to:

U prvom dijelu igra se: jednokružno (11 kola), a u drugom dijelu se razigrava na slijedeći način:

LIGA ZA PRVAKA: 1 – 6. plasirani klub iz prvog djela takmičenja, dvokružno (5+5=10 kola)

LIGA ZA OPSTANAK: 7 – 12. plasirani klub iz prvog dijela takmičenja, dvokružno (5+5=10 kola).

U drugi dio takmičenja klubovi prenose sve osvojene bodove i pogodak razliku ostvarenu temeljem rezultata utakmica prvog dijela takmičenja.

Raspored utakmica za prvi dio određuje se žrijebom takmičarskih brojeva klubova uz primjenu "Bergerove tablice", abecednim redom naziva klubova.

Raspored utakmica za drugi dio takmičenja određuje se uz primjenu "Bergerove tablice" time da klubovi dobivaju takmičarske brojeve identične ostvarenom plasmanu u pojedinu ligu (od 1. do 6.). U slučaju da dva ili više klubova ostvare identičan plasman u drugi dio takmičenja, takmičarski brojevi tih klubova određuju se ždrijebom.

### **Član 5.**

Takmičenje Premijer futsal lige BiH izvodi se prema Kalendaru takmičenja za prvenstvo Premijer futsal lige BiH za takmičarsku 2016/2017. godinu, kojeg usvaja Izvršni odbor NS/FS BiH.

Raspored odigravanja prvenstvenih utakmica vrši se žrijebom kojim rukovodi Komitet za takmičenje NS/FS BiH, najkasnije trideset dana prije određenog datuma za početak takmičenja. Žrijebanje vrši Komitet za takmičenje NS/FS BiH po Bergerovim tablicama abecednim redom imena klubova.

### **Član 6.**

Utvrđeni raspored takmičenja, odnosno promjena termina ili mjesta odigravanja utakmice, može se vršiti na osnovu podnesenog pismenog zahtjeva zainteresovanog kluba Komitetu za takmičenje NS/FS BiH, koji treba da sadrži razlog zbog kojeg se traži promjena termina uz priloženu pismenu dokumentaciju iz koje se može utvrditi njegova opravdanost, kao i eventualni prijedlog za novi termin.

Pismeni zahtjev za promjenu termina odigravanja utakmice klub je dužan podnijeti u roku od 8 (osam) dana od dana utvrđenog termina odigravanja po rasporedu utakmica putem Sektora za takmičenje i upravljanje događajima.

U slučaju kada zahtjev za promjenu termina odigravanja utakmice nije podnesen u predviđenom roku iz stava 2. ovog člana, klub je dužan dostaviti i pismenu saglasnost drugog kluba (protivnika) za promjenu termina odigravanja utakmice, a najkasnije u roku od 3 (tri) dana od dana utvrđenog termina utakmice.

Odluku o zahtjevu kluba za promjenu termina utakmice iz stavka 1. i 2. ovog člana donosi Komitet za takmičenje NS/FS BiH, s tim da se kod donošenja odluke moraju imati u vidu odredbe člana 19. i 20. Pravilnika o nogometnim/fudbalskim takmičenjima BiH.

Odluka Komiteta za takmičenje NS/FS BiH je konačna i ona se dostavlja zainteresiranim klubovima i ostalim sudionicima takmičenja.

Klubovi u takmičenju Premijer futsal lige BiH imaju pravo na izmjenu rasporeda odigravanja određenih prvenstvenih utakmica ukoliko daju više od dva igrača u "A" ili "U-21" Futsal reprezentaciju BiH.

## **ORGANIZACIJA UTAKMICE**

### **Član 7.**

Gostujući klub je obavezan pravovremeno obavijestiti domaći klub o vremenu dolaska u mjesto, odnosno ispred dvorane u kojoj se igra utakmica.

Klub domaćin je obavezan poduzeti sve potrebne mjere za sigurnost sudija, delegata i gostujuće ekipe, po dolasku, za vrijeme odigravanja utakmice i sve do napuštanja dvorane i mjesta odgovarajućim prevoznim sredstvom.

Prisustvo policije je obavezno 60 minuta prije početka utakmice, pa sve do napuštanja svih aktera sa mjesta takmičenja.

Klub domaćin je obavezan na svim prvenstvenim i kup utakmicama osigurati prisustvo policije, ljekara, vozilo za hitnu pomoć ili adekvatno zamjensko vozilo.

Ukoliko delegat utvrdi da je klub domaćin preduzeo sve potrebne radnje kako bi se izvršila obaveza iz stava 3. ovog člana, prisustvo policije, ljekar i vozilo hitne pomoći ili adekvatno zamjensko vozilo ne budu na raspolaganju do početka utakmice, ista neće započeti sve dok se ne osiguraju zadani uslovi, a najkasnije 15 minuta od zakazanog početka utakmice.

U slučaju da se u tom roku ne ispune uvjeti iz stavka 3. ovog člana, utakmica se neće igrati.

Klub domaćin obavezan je obezbjediti nosila i osobe za iznošenje povrijeđenih igrača izvan terena za igru.

Klub domaćin je obavezan obezbjediti licenciranog mjerioca vremena i najmanje jednu osobu za čišćenje terena, koji se moraju javiti delegatu i sudijama utakmice najmanje 30 minuta prije utakmice.

### **Član 8.**

Sve utakmice Premijer futsal lige BiH igraju se obavezno u dvorani koja je licencirana/primljena od strane nadležne komisije NS/FS BIH.

Klubovi su dužni 15 (petnaest) dana prije početka takmičenja prijaviti Sektoru za takmičenje i upravljanje događajima: dvoranu i alternativnu dvoranu, termin odigravanja utakmica, boje i rezervne boje opreme u kojoj će nastupiti, kao i rješenje o registraciji kluba.

### **Član 9.**

Za odigravanja utakmica Premijer futsal lige BiH klub domaćin obavezan je obezbjediti tri (3) ispravne lopte Karakteristike lopte moraju biti prema Pravilu 2. Pravila futsal igre.

### **Član 10.**

Dva poslednja prvenstvena kola prvog dijela i dva poslednja kola Lige za Prvaka i Lige za Opstanak igraju se istog dana i u isto vrijeme.

### **Član 11.**

Za vrijeme odigravanja prvenstvenih utakmica u tehničkom prostoru ekipe na klupi se mogu nalaziti slijedeće službene osobe:

- ljekar sa akreditacijom NS/FS BIH (obavezan isključivo na klupi domaćina)
- predstavnik kluba sa akreditacijom NS/FS BIH (obavezan, obučen u odijelo s košuljom ili službenu trenerku kluba)
- trener sa akreditacijom NS/FS BIH (obučen u odijelo s košuljom ili službenu trenerku kluba)
- pomoćni trener sa akreditacijom NS/FS BIH (obučen u odijelo s košuljom ili službenu trenerku kluba)

- fizioterapeut sa akreditacijom NS/FS BiH u sportskoj opremi
- zamjenski igrači (najmanje 3, najviše 9) (obučeni u sportsku opremu sa markerima koje daju igraču kojeg mijenjaju u igri).

Uz ogradu između klupa za zamjenske igrače, a izvan terena za igru mogu se još nalaziti samo:

- zapisnički sto sa akreditovanim mjeriocem vremena
- ljekar i 2-4 osobe za nosila (sa markerima)
- ljekar i vozač kola za hitnu pomoć, fotoreporter i snimatelji s odgovarajućim oznakama, potreban broj redara i zaštitara vidljivo obilježenih
- osoba za čišćenje terena za igru
- ukoliko je potrebno dodavači lopte obučeni u opremi različite boje od svih učesnika.

Svaki klub mora odrediti službenu osobu koja će ga predstavljati na utakmici. Predstavnik kluba mora imati akreditaciju NS/FS BiH koju stavlja na uvid delegatu prije utakmice. Službeni predstavnik kluba delegatu utakmice predaje sastav ekipe ovjeren pečatom kluba i sportske legitimacije igrača, kao i akreditacije trenera, ljekara i fizioterapeuta.

Samo jedna osoba može stajati u tehničkom prostoru i davati upute igračima za vrijeme igre.

Kretanje trenera ili jedne od službenih osoba dozvoljeno je samo unutar označenog tehničkog prostora označenog linijama, shodno Pravilu 1. Pravila futsal igre. Igrači se mogu zagrijavati u prostoru za zagrijavanje koji određuje sudija utakmice, a prema Pravilu 3. Pravila futsal igre.

Prilikom jednogminutnog odmora dopušteno je igračima koji su u tom trenutku igrali sjesti na klupu za zamjenske igrače uz službene osobe dok svi zamjenski igrači moraju ostanuti unutar tehničkog prostora.

U slučaju da sa klupe za zamjenske igrače bude isključena/odstranjena bilo koja službena osoba ili zamjenski igrač isti podliježe proceduri prema Pravilu 12. Pravila futsal igre.

### **Član 12.**

Klub domaćin dužan je obezbjediti odvojeno područje na tribinama u dvorani (najmanje 5 % ukupnog kapaciteta dvorane) za gostujuće navijače, te u slučaju očekivanja ili najave većeg broja navijača gostujućeg kluba izdvojiti posebnu blagajnu za taj sektor gledališta.

Gostujući klub dužan je najmanje 48 sati prije utakmice obavijestiti klub domaćin o načinu i organizaciji dolaska većeg broja navijača.

Za nered ili izgrede koji se dogode u dijelu dvorane koji je rezervisan za gostujuće navijače, gostujući klub ima objektivnu odgovornost te podliježe disciplinskim sankcijama.

### **Član 13.**

Klubovi su odgovorni za ponašanje svojih igrača, službenih osoba, članova, navijača i svake druge osobe koja obavlja dužnost na utakmici u ime kluba.

### **Član 14.**

Klub domaćin je obavezan na svim utakmicama postaviti na jarbole: državnu zastavu Bosne i Hercegovine, zastavu NS/FS BiH, a mogu se postaviti klupske, entitetske zastave, zastave županija/kantona, zastava fair playa. Istaknute zastave moraju biti istih dimenzija.

Postavljanje drugih zastava nije dozvoljeno, a u slučaju njihovog postavljanja, klub će snositi disciplinske sankcije po članu 52. Disciplinskog pravilnika NS/FS BiH.

Promocija ili objava, na bilo koji način političkih poruka ili bilo kojih drugih političkih djelovanja unutar ili u neposrednoj blizini dvorane strogo je zabranjena uoči, tokom ili nakon završetka utakmice.

Klub domaćin obavezan je postupiti u skladu s odredbama ovog člana, jer se u protivnom utakmica neće odigrati, a isti će snositi sve posljedice neodigravanja utakmice.

#### **Član 15.**

Klub domaćin obavezan je neovisnoj snimateljskoj kompaniji, koju ovlasti NS/FS BiH, omogućiti adekvatne uvjete za snimanje utakmice.

Također, TV kompaniji koja vrši direktni prijenos utakmice, klub domaćin je dužan osigurati punu sigurnost za opremu i zaposlene, za vrijeme i nakon završetka utakmice, u objektu stadiona.

#### **Član 16.**

Svaka dvorana mora imati moderan semafor da pruži gledaocima, igračima i službenim osobama tačne informacije koje se odnose na:

- imena obje ekipe,
- preostalog vremena u bilo kojem period igre, odbrojavanje u minutama, sekundama i desetinkama sekunde od 20.00.0 do 0.00.0,
- preostalo vrijeme kazne koje se izdržava, zbog isključenja igrača ili dva igrača iz obje ekipe, odbrojava 02.00-0.00.0,
- rezultat ,
- time-outa, odbrojava 01.00.0-0.00.0,
- akumulirane prekršaje.

U slučaju ne ispravnosti semafora u dvorani klub domaćin je dužan obezbjediti stolni elektronski pokretni semafor ili stolni ručni semafor (npr odbojka, stolni tenis...itd), i ručnu štopericu.

Klub domaćin je obavezan u dvorani obezbjediti oficijelni razglas za najavu sastava ekipa, igrača koji su postigli pogotke, saopštenja u vezi sa organizacijom utakmica i sl.

Nije dozvoljeno u dvorani koristiti dupli razglas i puštanje neprimjerene muzike.

### **TEREN ZA IGRU**

#### **Član 17.**

Prvenstvene utakmice Premijer futsal lige BIH mogu se igrati samo u dvorani koja zadovoljava propisane uslove iz Pravila 1. Pravila futsal igre.

Da li su dvorana i podloga za igranje nepodobni za igru zbog nepripremljenosti podloge ili zbog nečeg drugog, što spada u višu silu odlučuju sudija koji je određen za suđenje utakmice. Izvještaj o nepodobnosti dvorane – terena za igru preko delegata dostavlja Sektoru Odjelu za takmičenje i upravljanje događajima NS/FS BiH.

#### **Član 18.**

Na terenu za igru za vrijeme odigravanja utakmice zabranjen je bilo koji oblik reklamiranja ukoliko prethodno nije prijavljen i odobren.

## **ORGANIZACIONI SASTANAK**

### **Član 19.**

Klub domaćin dužan je osigurati prostoriju za radni sastanak – brifing, službenih osoba i predstavnika klubova, koji će se održati devedeset (90) minuta prije početka utakmice pod rukovodstvom delegata na utakmici a kojem obvezno prisustvuju:

- delegat
- sudije utakmice i mjerilac vremena
- službeni predstavnici klubova
- rukovoditelj osiguranja kluba domaćina
- Predstavnik MUP-a

U slučajevima kada to ocijeni potrebnim delegat može zatražiti da sastanku prisustvuju i rukovoditelji pojedinih službi i organa uključenih u organizaciju utakmice.

Komitet za takmičenje NS/FS BiH u slučaju potrebe, a posebno kod utakmica visokog rizika, može odrediti da se sastanak službenih osoba i predstavnika klubova održi prije utvrđenog vremena iz stava 1. ovog člana.

Na sastanku se obavlja provjera svih obavljenih zadataka u pripremi za odigravanje utakmice koji proizlaze iz odredbi Pravilnika o nogometnim/fudbalskim takmičenjima, Propozicija futsal takmičenja, Odluke o bezbjednosti na futsal utakmicama, Zakona o javnom okupljanju, te ostalih Odluka IO NS/FS BIH.

### **Član 20.**

Klub domaćin dužan je osigurati prostoriju za eventualnu konferenciju za novinare 15 minuta po završetku utakmice, kojoj obavezno prisustvuju licencirani treneri obje ekipe, te po jedan igrač iz svake ekipe koji je nastupio na utakmici.

## **PRAVO NASTUPA IGRAČA**

### **Član 21.**

Pravo nastupa na utakmicama Premijer futsal lige BIH imaju svi pravilno registrovani igrači koji su navršili 17 godina života i koji su stekli pravo nastupa na prvenstvenim utakmicama prema odredbama Pravilnika o registraciji, statusu i transferu igrača NS/FS BIH.

Iznimno na prvenstvenim utakmicama mogu nastupiti i igrači koji su navršili 16 godina života, a koji imaju specijalistički liječnički pregled kojim im se odobrava nastup za seniorsku ekipu.

Na utakmicama Premijer futsal lige BIH mogu nastupiti samo oni igrači koji su proglašeni zdravstveno sposobnim što mora biti upisano u sportsku legitimaciju, ili uz spisak o izvršenom ljekarskom pregledu, ovjerenim od strane ovlaštene zdravstvene ustanove, koji važi samo jednu utakmicu. Rok trajanja ljekarskog pregleda vrijedi 6 (šest) mjeseci od dana upisa u sportsku legitimaciju.

Na prvenstvenim utakmicama nemaju pravo nastupa igrači koji se nalaze pod suspenzijom, kaznom zabrane igranja i automatskom kaznom zbog tri opomene.

Automatsku kaznu zabrane igranja jedne prvenstvene utakmice nastalu zbog dobivene tri opomene igrač izdržava na prvom slijedećoj prvenstvenoj utakmici.

Po završetku prvenstva brišu se opomene igrača (žuti kartoni), te se ne prenose u narednu sezonu.

Obaveza klubova je da su dužni voditi evidenciju javnih opomena, shodno članu 17. Disciplinskog pravilnika NS/FS BiH.

Klub Premijer futsal lige BIH treba za utakmicu prijaviti minimalno 7 (sedam) prisutnih, registrovanih igrača za nastup u sportskoj opremi, koji se upisuju u zapisnik sa utakmice. Ekipe koje nemaju minimalno 7 (sedam) igrača u zapisniku snosiće disciplinske sankcije.

Utakmica ne može započeti sa manje od pet (5) igrača. Minimalan broj igrača jedne od ekipa na terenu za igru su 3 (tri) igrača da bi se utakmica završila. Igrači koji nemaju pravo nastupa na toj utakmici ne računaju se u navedenih potreban broj igrača.

Na utakmicama Premijer futsal lige BIH klubovi su obavezni u zapisnik sa utakmice prijaviti najmanje tri igrača mlađa od 21 godinu (rođeni 01.01.1995. god. i mlađi), sa obaveznom sjedenjem u opremi na klupi u tehničkom prostoru.

Svaki klub u takmičenju Premijer futsal lige BIH obavezan je utakmicu igrati sa svojom najboljom ekipom.

### **Član 22.**

U takmičenju Premijer futsal lige BIH dopušten je nastup tri (3) igrača strana državljana na utakmici. Igračima iz prethodnog stava ne smatraju se igrači koji imaju dvojno državljanstvo od kojih je jedno Bosne i Hercegovine.

Igrač koji je upisan u zapisnik sa utakmice, a nije ušao u igru smatra se da nije nastupio na utakmici.

Igrač kome je istekla radna dozvola nema pravo nastupa, a ako nastupi klub snosi takmičarske i disciplinske sankcije.

Igrač koji nije upisan u COMET sistem ne može nastupiti na utakmici.

### **Član 23.**

Na svim prvenstvenim utakmicama može biti prijavljeno do devet (9) zamjenskih igrača prema Pravilima futsal igre, shodno Pravilu 3. (broj zamjena igrača u igri nije ograničen).

Igrač registrovan za veliki nogomet/fudbal u jednom danu može nastupiti na dvije utakmice, i to isključivo na dvije utakmice futsala ili na jednoj utakmici futsala i jednoj utakmici velikog nogometa/fudbala.

## **OPREMA EKIPA**

### **Član 24.**

Klubovi Premijer futsal lige BIH dužni su Sektoru za takmičenje i upravljanje događajima NS/FS BiH najmanje 15 dana prije početka prvenstva, u pismenoj formi prijaviti osnovnu i rezervnu boju dresova u kojima će nastupati.

Klubovi nastupaju u prijavljenoj boji sportske opreme na utakmici.

Ako je sportska oprema identične boje, domaćin prvoimenovani klub će promijeniti dresove u različitu boju od protivnika.

Dresovi ili majice jedne ekipe moraju biti istih boja i na poledini označeni jasno čitljivim brojevima od 1-20 smještenim u sredini, visine od 25 do 35 centimetara. (Radi identifikacije i pokazivanja zapisničkom stolu od strane sudija brojevi ekipa mogu biti samo do 20).

Vratar mora nositi dres ili majicu koji se vidno bojom razlikuje od dresova njegovih suigrača, igrača protivničke ekipe i sudija.

Igrač leteći vratar je obavezan imati isti dres kao vratar utakmice, ali sa svojim brojem upisanim u zapisniku sa utakmice.

Brojevi na dresovima moraju odgovarati onima na popisu igrača u Zapisniku sa utakmice, prema Pravilu 3. Pravila futsal igre.

Klubovi su obavezni osigurati markere različitih boja od sportske opreme za zamjenske igrače, koje uručuju igraču koji izlazi iz igre prilikom zamjene.

Ako gostujući klub nema markere, domaćin će mu posuditi.

Klub domaćin obavezan je za foto - reportere obezbjediti vidljive oznake koje su oni obavezni nositi za vrijeme utakmice, ali različite boje u odnosu na markere ekipa.

## **DELEGAT NA UTAKMICI**

### **Član 25.**

Delegata na utakmici određuje Komitet za takmičenje NS/FS BiH sa liste delegata koja je utvrđena za Premijer futsal ligu BiH za takmičarsku 2016/17. godinu.

Delegat mora doći 90 minuta prije početka utakmice.

Delegat na utakmici zastupa rukovodstvo takmičenja, kontroliše ispravnost nastupa igrača, organizuje utakmicu u svim njenim segmentima, dostavlja izvještaj o utakmici i ima vrhovni nadzor nad utakmicom.

Delegat na utakmici svoju dužnost dužan je obavljati u skladu sa Uputstvom o vršenju dužnosti delegata na utakmicama Premijer futsal lige BiH.

Delegat utakmice je obavezan zapisnik voditi putem Comet-a, isti sravniti sa sudijom, koji će izvještaj u Comet-u zaključiti sa svojom šifrom.

Delegat je svoj izvještaj putem Comet-a dužan sačiniti i zaključiti 24 sata poslije utakmice, a spisak igrača poslati e-mailom ili poštom u Odjel za takmičenje NS/FS BIH.

### **Član 26.**

Delegat na utakmici u saradnji sa ostalim službenim licima (sudijama utakmice), dužan je voditi računa o pravilnom i tačnom unošenju podataka u zapisniku sa utakmice.

U slučaju da na utakmicu ne dođe određeni delegat, dužnost delegata će obaviti treći sudija.

### **Član 27.**

Za svaku prvenstvenu utakmicu obavezno se sačinjava zapisnik o odigranoj utakmici putem Comet sistema, a klub domaćin obavezan je delegatu utakmice staviti na raspolaganje printer i računar sa internet konekcijom. Ukoliko nema mogućnosti da se zapisnik sačini putem Comet-a, isti je potrebno uraditi ručno, a potpisuju ga delegat, sudija i službeni predstavnici ekipa.

Delegat je dužan na sve delegirane utakmice doći u odijelu sa košuljom i kravatom.



## **KOORDINATOR ZA BEZBJEDNOST**

### **Član 28.**

Na utakmicama na kojima je potrebno prisustvo koordinatora za bezbjednost NS/FS BiH, istog određuje Komitet za stadione i bezbjednost NS/FS BiH, a nakon obavljenih konsultacija sa Komitetom za takmičenje NS/FS BiH i direktorom Sektora za takmičenja i upravljanje događajima NS/FS BiH.

Uloga i obaveze koordinatora za bezbjednost definisane su Uputstvom koje donosi Komitet za stadione i bezbjednost NS/FS BiH.

## **SUDIJE / SUCI**

### **Član 29.**

Komitet za sudije i suđenje NS/FS BiH određuje sudije za utakmice sa liste sudija za futsal. Utakmicu sude 3-ca sudija. Na dvije bočne strane terena po (1) jedan, dok se treći sudija nalazi pored zapisničkog stola. Sudije su dužni doći u dvoranu 90 minuta prije vremena predviđenog za početak utakmice, pregledati teren za igru prema članu 1 i 2. Pravila futsal igre. Ako sudije ustanove da je teren nepodoban za igru i da se utakmica ne može igrati, dužni su svoju odluku saopštiti delegatu na utakmici koji će o tome sačiniti izvještaj i obavijestiti Komitet za takmičenje NS/FS BiH.

Sudije su dužne na sve delegirane utakmice doći u odijelu sa košuljom i kravatom.

### **Član 30.**

Sudija utakmice obavezan je sa delegatom pregledati i usaglasiti zapisnik sa utakmice i zaključiti ga svojom šifrom u sistemu Comet.

Sudije utakmice dužne su za sve učinjene prekršaje od strane igrača, službenih lica i drugih sportskih radnika ili pojedinca koji svojim djelovanjem čine disciplinski prestup prije, u toku i po završetku utakmice, podnijeti prijavu protiv učinioca prekršaja Disciplinskoj komisiji NS/FS BiH.

## **ANTIDOPING KONTROLA**

### **Član 31.**

Klub domaćin dužan je osigurati prostoriju za provođenje antidoping kontrole. Prostorija sačinjavaju:

- prostorija za čekanje, koja mora biti opremljena hladnjakom sa dozvoljenim pićima i čašama za piće.
- prostorija s radnom površinom za popunjavanje obrazaca i rad sa uzorkom.

Pristup prostorijama i lokacija prostora za provođenje doping kontrole trebaju biti jasno označene natpisom DOPING KONTROLA.

## **ZABRANA NASTUPA**

### **Član 32.**

Suspendovana ekipa ne može nastupiti na prvenstvenoj ili kup utakmici sve dok traje suspenzija.

## **ŽALBA**

### **Član 33.**

Žalbe na utakmicu podnose se Komitetu za takmičenje NS/FS BiH koji ih rješava u prvom stepenu.

Žalbe po svim osnovama moraju se najaviti e-mailom, telegramom ili faksom najaviti u roku od 24 sata od dana odigravanja utakmice. Obrazloženje žalbe mora se dostaviti u dva primjerka, putem emaila ili pošte ili telefaksa sa dokazom o uplaćenju taksi u roku od 48 sati od dana odigravanja utakmice.

Za utakmice posljednja dva kola prvenstva, žalbe se najavljuju i dostavljaju u roku od 2 (dva) dana od dana odigravanja utakmice.

Ukoliko rok za žalbu ističe u nedjelju ili na državni praznik on se produžava na prvi slijedeći radni dan.

Odluke o podnijetim žalbama na utakmice donose se najkasnije u roku od četrnaest (14) dana od dana prijema žalbe, odnosno pet (5) dana ukoliko se radi o žalbi na utakmicu odigranu u posljednja dva kola prvenstva.

## **TAKSA NA ŽALBU**

### **Član 34.**

Visinu takse na žalbu po svim osnovama utvrđuje Izvršni odbor NS/FS BIH. Taksa se vraća podnosiocu samo ukoliko se žalba u potpunosti usvoji.

### **Član 35.**

Nenajavljene, neblagovremene ili nedovoljno taksirane žalbe neće biti uzete u postupak, već će biti odbačene, a utakmica će biti registrovana postignutim rezultatom.

Pri ocjeni pravovremenosti žalbe uzima se u obzir datum e-maila, poštanskom žigu preporučenog pisma ili telegrama, datum na faksu potvrdi o žalbi odaslanom telefaksom ili datum na novčanoj uplatnici.

### **Član 36.**

Žalbe na odluke Komiteta za takmičenje podnose se Apelacionoj komisiji NS/FS BIH u roku od osam (8) dana od prijema pismene odluke.

Za utakmice dva posljednja kola rok za podnošenje žalbe je tri (3) dana. Žalba se podnosi putem Komiteta za takmičenje čija se odluka žalbom pobija.

Odluke o podnijetim žalbama na odluke Komiteta za takmičenje donose se najkasnije u roku od osam (8) dana, a o žalbama podnijetim na utakmice posljednja dva kola u roku od tri (3) dana od dana prijema žalbe.

Žalbe na odluke Disciplinskog komisije podnose se Apelacionoj komisiji u roku od osam (8) dana od prijema pismene odluke.

Protiv odluke Apelacione komisije ne može se uložiti žalba.

## **REGISTRACIJA UTAKMICE**

### **Član 37.**

Ako na utakmicu nije uložena žalba, a ne postoje razlozi za registraciju utakmice po službenoj dužnosti sa 3:0 (par forfe), utakmica će se registrovati postignutim rezultatom.

Odigrane utakmice registruje Komitet za takmičenje NS/FS BiH na svojoj narednoj sjednici.

Izuzetno, komitet za takmičenje registraciju odigranih utakmica može izvršiti putem e-maila, telefona ili faksa.

Jednom registrovana utakmica ne može biti poništena od strane Komiteta za takmičenje, ako je odluka postala pravosnažna ili je u drugom stepenu donijeta odluka koja je konačna, osim u postupku predviđenom Pravilnikom o nogometnim/fudbalskim takmičenjima.

## **UTVRĐIVANJE PLASMANA**

### **Član 38.**

Plasman klubova na tabeli utvrđuje se prema odredbama člana Pravilnika o nogometnim/fudbalskim takmičenjima NS/FS BiH.

### **Član 39.**

Ako se iz bilo kojih razloga u toku takmičenja u takmičarskoj godini 2016/17. pojavi prazno jedno ili više mjesta Premijer futsal liga BiH se ne popunjava.

## **DISCIPLINSKA NADLEŽNOST**

### **Član 40.**

O disciplinskim prekršajima klubova, igrača, članova stručnog i tehničkog rukovodstva i funkcionera klubova i službenih lica na utakmici koji učestvuju u takmičenju, odlučuje se na osnovu Disciplinskog pravilnika NS/FS BiH.

Drugostepene odluke po disciplinskim prekršajima su konačne.

U interesu regularnosti takmičenja nadležni organ može utvrditi i skraćeni žalbeni postupak.

## **FINANSIJSKE ODREDBE**

### **Član 41.**

Prihodi sa prvenstvenih utakmica od prodaje ulaznica i marketinških aktivnosti pripadaju klubu domaćinu.

### **Član 42.**

Službenim licima na utakmici pripadaju odgovarajuće naknade (dnevnice, putni troškovi i takse), u skladu sa odlukom Izvršnog odbora NS/FS BiH. Isplata se vrši putem Sektora za finansije NS/FS BiH.

## **TV PRENOS**

### **Član 43.**

Prvenstvene utakmice Premijer futsal lige BiH mogu se direktno prenositi putem televizije, a televizijski prenos utakmice može se realizovati samo na osnovu sporazuma Televizije i NS/FS BiH. Prvenstvene utakmice klubova Premijer futsal lige BiH mogu se prikazivati kao reportaže ili snimke na televiziji.

### **Član 44.**

Klubovi učesnici takmičenja obavezuju se poštovati odredbe Propozicija takmičenja za Premijer futsal ligu BiH, Odluke IO NS/FS BiH i odluke organa takmičenja kao i načela Fair Play-a.

## **NAGRADE**

### **Član 45.**

Prvoplasirani klub prvenstva Premijer futsal lige BiH osvaja prelazni pehar NS/FS BiH na kome se upisuje njegovo ime i godina osvajanja prvenstva.

Pored prelaznog pehara NS/FS BiH prvoplasiranom klubu se dodjeljuje pehar u trajno vlasništvo i 20 zlatnih medalja.

Pehar u trajno vlasništvo dodjeljuje se najboljem klubu u Fair play-u na osnovu tabele koju vodi Odjel za takmičenje NS/FS BiH.

#### **Član 46.**

Za sve što nije predviđeno ovim Propozicijama vrijede odredbe Pravila futsal igre, Odluke Međunarodnog BORD-a. Pravilnika o nogometnim/fudbalskim takmičenjima NS/FS BiH, te ostalih propisa i odluka NS/FS BiH.

#### **ZAVRŠNE ODREDBE**

Izvršni odbor NS/FS BiH ovlašten je da daje uputstva za primjenu ovih Propozicija.

#### **Član 47.**

Za sve što nije predviđeno ovim Propozicijama, važe odredbe Pravilnika o nogometnim/fudbalskim takmičenjima NS/FS BiH, Pravila futsal igre i drugih propisa NS/FS BiH, FIFA-e i UEFA-e.

#### **Član 48.**

Propozicije stupaju na snagu danom donošenja, a primjenjuju se za takmičarsku godinu 2016/17.

**P R E D S J E D N I K**

**Elvedin Begić, s.r.**

Na osnovu člana 35. Statuta Nogometnog/Fudbalskog Saveza Bosne i Hercegovine, Izvršni Odbor Nogometnog/Fudbalskog saveza BiH, na sjednici održanoj 23.05.2016. godine, d o n o s i

## **PROPOZICIJE** **ZAVRŠNOG DIJELA KUP-a BOSNE I HERCEGOVINE** **U FUTSALU ZA TAKMIČARSKU 2016/17. GODINU**

### **OPŠTE ODREDBE**

#### **Član 1.**

Ovim Propozicijama utvrđuje se način rukovođenja i organizovanja završnog dijela KUP-a Bosne i Hercegovine u FUTSALU.

### **UČESNICI TAKMIČENJA**

#### **Član 2.**

U KUP-u Bosne i Hercegovine u futsalu učestvuje 16 (šesnaest) klubova i to:

- 12 klubova iz Premijer futsal lige BIH.
- Nogometni savez Federacija BiH daje 2 kluba i FS Republike Srpske daje 2 kluba.

Utakmice se igraju po jednostrukom Kup sistemu, izuzev finala kada se igraju dvije utakmice.

Žrijebom se određuje i mjesto odigravanja prve utakmice finala, a u slučaju da su finalisti iz istog mjesta, žrijebom se određuje dvorana u kojoj će biti odigrana prva utakmica finala.

### **RUKOVOĐENJE TAKMIČENJEM**

#### **Član 3.**

Takmičenjem rukovodi Komitet za takmičenje, u saradnji sa Sektorom za takmičenja NS/FS BiH, i utvrđuje način žrijebanja klubova, a Kalendar takmičenja usvaja IO NS/FS BiH.

### **PRAVILA IGRE**

#### **Član 4.**

Utakmice se igraju po Pravilima futsal igre.

### **DELEGAT**

#### **Član 5.**

Komitet za takmičenje NS/FS BiH određuje delegata utakmice, koji zastupa rukovodstvo takmičenja, kontroliše ispravnost sportskih iskaznica, licenci službenih osoba i nadležan je za kontrolu cjelokupne organizacije utakmice.

### **SUDIJE / SUCI**

#### **Član 6.**

Komitet za sudije i suđenje NS/FS BiH određuje sudije utakmice sa liste sudija za futsal. Utakmice sude 3 (tri) sudija i to na dvije bočne strane po 1(jedan), dok se treći sudija nalazi kod zapisničkog stola.

Sudije su dužne doći u dvoranu 90 minuta prije vremena predviđenog za početak utakmice i pregledati teren za igru prema članu 1. i 2. Pravila futsal igre.

## **TEREN**

### **Član 7.**

Utakmice završnog dijela kupa Bosne i Hercegovine u futsalu igraju se u sportskim dvoranama, licenciranim za odigravanje futsal utakmica.

## **ORGANIZACIJA UTAKMICA**

### **Član 8.**

Organizaciju utakmica vrše klubovi domaćini, koji su obavezni obezbjediti sve uslove u skladu sa važećim propisima.

Zapisnik sa utakmice radi se elektronskim putem u COMET sistemu.

Organizaciju finalnih utakmica u saradnji sa klubom domaćinom vrši NS/FS BiH.

## **PRAVO NASTUPA**

### **Član 9.**

Pravo nastupa na Kup utakmicama futsala imaju igrači koji su stekli pravo igranja u skladu sa Pravilnikom o registraciji i transferu igrača NS/FS BiH i ovjerenim ljekarskim pregledom od nadležne zdravstvene ustanove.

## **IDENTITET IGRAČA**

### **Član 10.**

Identitet igrača utvrđuje se na osnovu sportske legitimacije ili ličnih isprava (lična karta, pasoš).

## **UTVRĐIVANJE PLASMANA**

### **Član 11.**

U slučaju identičnog rezultata iz dvije finalne utakmice izvode se udarci sa tačke od šest metara kojim se dobija pobjednik Kup-a, a prema Pravilima futsal igre.

## **ŽALBE**

### **Član 12.**

Žalbe na odigrane utakmice dostavljaju se u pismenoj formi, u roku od 24 (dvadeset četiri) sata po završetku utakmice.

Žalba na prvostepenu odluku podnosi se drugostepenom organu iz člana 3. ovih Propozicija, u roku od 48 (četdeset osam) sati od prijema odluke.

Visinu takse na žalbu je 50 % u odnosu na određene takse BH Telecom Premijer lige BiH.

Taksa se vraća podnosiocu, ako je žalba u potpunosti usvojena.

## **NAGRADE**

### **Član 13.**

Pobjednik Kupa Bosne i Hercegovine u futsalu dobiva prelazni pehar i pehar u trajno vlasništvo, a igrači, tehničko i stručno rukovodstvo 20 (dvadeset) zlatnih medalja.

Igrači, tehničko i stručno rukovodstvo drugog finaliste dobivaju 20 (dvadeset) srebrenih medalja.

Službena lica (sudije, delegat i mjerioci vremena) dobivaju sveukupno 5 (pet) zlatnih medalja.

## **ZAVRŠNE ODREDBE**

### **Član 14.**

Za sve što nije predviđeno ovim Propozicijama, važe odredbe Pravilnika o nogometnim/fudbalskim takmičenjima NS/FS BiH, Pravila futsal igre i drugih propisa NS/FS BiH, FIFA-e i UEFA-e.

### **Član 15.**

Propozicije stupaju na snagu danom donošenja, a primjenjuju se za takmičarsku godinu 2016/2017.

**P R E D S J E D N I K**

**Elvedin Begić, s.r.**